

84 Коти

р. Т 19

ИВАН ТАРАБУКИН

ВИТЬКА ПЕТАЛІС ТУЙО



ИВАН ТАРАБУКИН


ВИТЬКА ПЕТАЛІС ТУЙӦ



КОМИ КНИЖНОЙ ИЗДАТЕЛЬСТВО
СЫКТЫВКАР 1972

НАЦИОНАЛЬНАЯ ДЕТСКАЯ
БИБЛИОТЕКА РЕСПУБЛИКИ КОМИ

Челядь! Тайӧ книгасьыс ті лыдьянныд не сӧ-
мын сы йылысь, кыззи Витя нима детинка ӧшым-
каӧн веськалас теплоход вылӧ да петалас туйӧ.
Мирон дедлысь олӧм-вылӧмсӧ, сылысь челядь
дырсӧ тӧдмаланныд, а сідз жӧ мукӧд тешкодъ
вӧвлӧмторъяс петкӧдчасны тіян водзӧ.



ВЕТЛЫСЬ-МУНЫСЬ ТУЗИК

— Тузя, талун тэкөд янсөдчам дыр кезлө! Кылан? Янсөдчам, мися! Ме өд муна лагерө. А тэ кольччан! Смотри! Кывзысь Леналысь! Мый сийө тшөктас, сийөс и вөч да сідзи и ов! Воа гортө да, лооны кө тэ вылө нора-сьомьяс, бурөс эн виччысь! Поведениетө чинта! Ена эн дур!— Тадзи велөдіс дас арөса Славик ассьыс радей-тана другсө— ичөтик понйөс, кодөс шуөны Тузикөн, дженьыда да меліджыка кө — Тузяөн.

Тузя куйліс джодж шөрын да пельсө лапйөдлөмөн, юрсө отарө-мөдарө пөлнөдлөмөн сюся кывзис. Сийө быттьө думайтис аслас пон думьяснас: ладнө пө, ветлы, а сэсся видзөдлам! Олөмыс пө өд петкөдлас!

Тузик ичөтик тушаа, мач кодь гөгрөсиник, смоль сьөд гөна. Сьылі гөгөрыс еджыд кытш, быттьө еджыд гал-стука. Плешкас быттьө лым мач — еджыд чут жө. Весиг пемыдінын тыдалө тайө пасыс.

Славик да Тузик олісны дружнөя, пыр өтилаынөсь. Кытчө Славик оз тувчы, сэні и Тузик. Школаө ветлөд-лөны тожө өтилаті. Тузик пыр нин колльөдас ассьыс

другсö школадзыс да бöр гортас мунас сöмын сэки, кор лоö первой звöнок да кор Славик аслас класс öшинь пырыс öвтыштас кинас: позьö пö нин мунны гортö.

А урокъяс помасьöмтö Тузикыс кутшöм бура тöдö! Некор оз сёрмы! Видзöдан да, медбөръя урок помасигас Тузя лётсьöдö нин локтö Славиклы паныд.

Но вот воис лагерö мöдöдчан кад. Славиклөн чойыс, Ленаыс, кодi велöдчис кökьямысöд классын, и шуö:

— Славик, ми Тузякöд тэнö колльöдам. Мамыд да Тузик пристаньянь бöр бергöдчасны гортö, а ме нуöда тэнö «Ялаа Ягöдзыд». Меным окота жö ветлынысö теплоход вылас.

Нельöн и мöдöдчисны пристань вылö, теплоход дорö. Тузя зев радпырысь лётсьöдö-тилзьöдö Славиккöд орччөн. Со пö öд и ме мöдöдчи ыли муö-ваö! Тырмас пö нин горт гөгöрын шлёнъявны да чипанъясöс весьöпöртны!

Славик быттö гөгөрвоис Тузялысь весьшөрö радлём-чиктылёмсö да мелiа малыштлёмөн сёрнитiс ськöд:

— Тузя, тэ эськö зев радпырысь мунан да... Лагерад öд тэнö оз сибöдны. Тэнад, Тузя, галстукыд абу мелөн кодь да и путёвкаыд абу...

— Тэрмась, тэрмась, Славик! Став мунысь пионерыс, көнкö, пристаньянысь!— шуис Славиклөн мамыс.— А тэ, Тузик, нинöмла и пристаняс лётсьöдан да. Кытчöкө ешö йöз пöвстас гудыртчан дай. Корсь сэсся тэнö!

Тузик видзöдлiс сёрнитысь мам вылö. Ладнö пö, мöдöдчи да ветла нин.

Муртса на удитiсны пуксьöдавны пионерьясöс теплоход вылö, кызди Лена казялiс чемоданьяс сайысь дзесьöм Тузикöс...

— Славик, Славик! Понйыд тай тшöтш пырöма! Вöтлы, вöтлы Тузиктö! Кытчö нö сийö мунас!? Öд куимнаннымöс щöтьöдасны теплоход вывсьыд,— грöзитчис Лена.

А Тузик нöшта на пыдöджык пырис челядь кöлуй костö. Кытчö нö пö менö вöтланныд? Асьнытö пö быд лун школадзыд колльöддывла, а ме пö öтчид мöдöдчи да сэнi нин лишнöй лои! То öд пö кутшöм гажа да лöсьыд теплоход вылас!

Мукöд пионерьяс тожö казялiсны да быдöнлөн жалыс петiс. Кодi кöлач сетö, кодi калбас тор, а Славиклөн öти класса велöдчысь весиг курög кольк вöзйылiс...

Но Тузик, тыдало, шогө воома да нинөм оз босът... Ку-
тшөм пö нин сөйөм!

— Лена, мед нө ветлас лагерөдзис... Тэкөд өд бөр
локтас! Мед нин тшөтш колльөдө... Öд дзонь төлысь
сэсса ог аддзисълөй...—корис чойлысь Славик. А ма-
мыс берегсянь горөдис:

— Вошө кö, ачюд жö кутан бөрдны...

— Мед нө ветлө,— сөгласитчис Лена.

* * *

Коли лун, коли мөд... Пионеръяслөн лагерыс збы-
лысь вöли мича да гажа ягын, ялаа ягын, Эжва берег
вылын.

Асывводз. Линейка водзын кузь зиб йылын шпорөд-
чис-дöлалис гөрд флаг. Горнист ворсис подъём.

Челядь чукөр, сералигтырйи, ки чышкөдъяс пельпом
вылө öшөдөмөн, вожатөйкөд лэччисны Эжва дорө мыс-
сыны.

Пристань дорө, кодi вöли мыссиянисянь неуна гор-
улынджык, сувтис карсянь кывтысь теплоход.

— Славик! Эсiйö абу-ö тэнад Тузикыд? То, то скод-
ни кузя тшак вотны локтысьяскөд лэччө берегас!— ка-
зялисны Славиклөн ёртъясыс да кутисны горзыны: «Ту-
зик, Тузик!»

А Тузик, кызди кылис ассыс нимсö, нель кокйыв
матыстчис челядь дорө... Со пö ме и вои! Мыйөн ад-
дзис Славикöс, веськыда чеччыштис морöс вылас.

— Ту-зик! Öтнад али мый нө воин?— шензис Сла-
вик.

— Ув! Ув! Ув!— Туйсö пö өд төда.

— Кызди нө тайö кужис локнысö да стöч петны тайö
пристаняс!?— дивуйтчисны челядь.— Но и но!

— Славик, тэнад али мый понйис?— неуна торйөн-
джык мыссысь вожатөй Анна Васильевна юалис Сла-
виклысь.

— Менам эськө да..,— синва сорөн нин висьталис
Славик.— Вошө өд тайö, Анна Васильевна... А лагерь
пытшкад оз лэдзны...

Недыр чөв олыштөм бöрын Анна Васильевна шуис:

— Но ладнö! Эн бөрд, Славик! Понтö öнi йөртлам
вахта вылө. Лагерö, дерт, оз лэдзны. Но кык час мысти
тайö жö теплоходыс бөр кутас катны карö, да завтрак
бөрти и колльодам теплоход вылас. Эн шогсы! Оз

вош! Пристаньсянь бөр гортад воас, татчөдз кё нин воис...

— Ме тшөтш колльода, Анна Васильевна?

— И ме тшөтш...

А Тузик сідзи и чеччалө, сідзи чеччалө. То пö ставныс кутшөм радөсь менам воөм вылө! Ладнө пö ещö локсьома! Онi пö сөсся ог нин янсөдчылөй...

Но Тузиклөн чиктылөмыс бара на вөлөма дженьыд нэма.

Збыльысь, кык час мысти челядь чукөр Тузяөс колльөдiсны катысь теплоход вылө. А колльөдөмыс ещö кутшөм вөли! Челядь асланыс завтракьясысь зептаныс суйыштөмаөсь и Тузиклы чөсмасянторьяс. Медым пö нин ветлысь-мунысьыс тшөтш завтраккайтыштас. Кодi котлет джын босьтөма, кодi булки кватитөма, кодi сахар тор...

Славик босьтөма зэв кузь ньөр да грөзитчө:

— Мун гортө! Мун гортө! Да нөшта кё локтан, кыкнан пельтө нетшышта!


Сөсся кватитiс Тузяөс моздорас да пыртiс палуба вылө.

— Ляв! Ляв! Ляв!— Тузик сідзи и көсйө шыбитчыны ваө.

Теплоходвывса матрос, кодi лэдзалө йөзсө, гөгөрвоис нин Славиклысь төждысьөмсө:

— Эн шогсы, детинка, эн шогсы! Некытчө оз вош тэнад другыд!— Босьтiс киняулас да пыртiс капитанскөй рубкаө.

Төлысь чөжөн кыкысь на челядь чукөр колльөдлiсны Тузяөс бөр гортас. Кыкысь на волiс өтнас пионерскөй лагерө. Весиг теплоходвывса рулевөйяс кутiсны серавны Славик быдтас вылө. Он пö и төдлы, кыдзи пырас теплоход вылө да туй чөжыс оз и петкөдчыв, кутшөм «каютаын» ветлөдлө тэнад билеттөм «пассажирыд». А мыйөн пö лэдзан трап тайө пристаняс, петө первой «мортөн»...



ВИТЬКА ПЕТАЛІС ТУЙӨ

Асыв. Июлься шондi удитöма нин качöдчыны лöз энэж шөрö. Карса пристань дорö сувтiс баржаяса буксирнöй теплоход, кодлөн нимыс вöли «Вымь».

Капитан Синявин висьталiс аслас командалы, мый нель час мысти тыра куим баржаөн мөдöдчасны транзитөн Котласöдз. А öни муноны ломтас босьтны.

Кор «Вымь» сувтiс заправочнöй дорö, машинист Сырчиков юасис капитанлысь ветлыны карö недыр кeжлö. Öти улича вылын сийö паныдасис аслас, велöдчыны пыртöм на, сизим арöса племянник Витькакöд.

Сийö вöли ва тыра бөрöздаын — пидзöсöдзыс келöма, öти гач коксö пуджöма, а мöдыс ставнас кöтасьöма нин — тойлалö ас вöчöм, паруса ичöтик пыж. «Судно» бокас гижöма гырысь букваөн «Вымь».

— А-а! «Капитан» Сырчиков! Моё поштение! — гажаа шыасис теплоходвывса машинист. — Кутшöм океан-морeö думайтан петны тайö каналсьыс? Но и моряк! — матыстчис Витька дорö да малыштiс сийöс юрöдыс.

Детинка лэптiс юрсö да тöдiс асьыс дядьсö.

— Дядя Костя, дядя Костя! Босьтлы менö теплоход вылад! — радпырысь, ваысь петöмөн, горöдiс детинка. — Кöть Тентюковöдз нуöдышт.

Кар пристаньсянь Тентюковөдз куим километр.

— Ог. Тайö рейсөн ог вермы босьтны, муса пи... Сидз нин лоас... Миян теплоходыс муно транзитон Котласөдз, некытчо сувтлытөг, баржаясыс ыджыд грузаось, сувтлынысö ог вермой... Водзö аддзысьлытөдз!— веськыд кисö козырёк доро вайодломон шуис машинист Сырчиков да мөдөдчис водзö, а Витька нöшта на горөдис:

— Дядя Костя, а көни нö тэнад теплоходыд сулалө? Сырчиков сувтовкерлис да шуис:

— То эстөни... төварной пристань дорас...— öвтыштіс кинас да мунис водзö.

Машинист Сырчиков эськө и дась босьтны племянниксö теплоход вылө, мед детинкаыс ветлис көть öти рейс, да бать-мамыслы висьтавтөм лоө, оз эшты пыравнысö да.

Витька некыдз эз вермы миритчыны, мый теплоход оз вермы сувтлыны, көсьяс кө. «Теплоход пö муно транзитон... Ыджыд тай! Мед нö муно! Ме и транзистыскөд на верма ветлыны Тентюковөдзыд!»

Митька кватитіс киняулас асьыс судносö да веськөдчис пристаньянь.

Төварной пристань дорын, көни сулалісны буксирной теплоходьяс, ыджыда нокисны. Öти баржа ректöны, мөдөс грузитöны... Витькалы вöлі колö пырны төварной пристань вылө, но кыдзи сэтчө пыран? Ворота дорын сулаліс кутшөмкө зэв скөр тётя да матö оз сибөд. Ачыс ещö шпуткө-куритö на...

Витя дыр сулаліс дзирья дорын, но куритчысь тётя дінö матыстчыны эз лысьт.

Со и бара воссис ворота: колö лэдзны грузөвöй машина. Витька мөдөдчис пырны машина сайö саймовтчөмөн, но скөр тётя пырысь-пыр жö казяліс, кватитіс Витькаос шошаөдыс да тойыштіс машина дорысь...

Мый вöчны? Детинка мөдөдчис ва дорлань, көни заборыс веськыда зурасьöма юас. Ваас на ещö мыйкө мында пырöма.

«Эк эськө, ыджыдджык кө вöлі менам теплоходöй, некодлысь эськө эг юась, весиг куритчысь тётялысь... Но да ладнө, и берег пöлöныс гуляйтыштам!»— думыштіс Витька да лэдзис асьыс «Вымсö» ваас...

Мыйөн ичөтик пыжыс воис ваөдзыс, быттьö чеп йылысь мыни! Визулыс кватитіс сійөс, төвруыс зэвтіс па-

руссö — и «судно» мөдөдчис кывтны өтнас: прöщайтлы пö, Витька, да лөкөн эн казътыв!

Витя гөгөрвоис ассыс өшыбкасö да зэв ёна бёрд-дзис.

Но буретш тайö кадас чери кыйысь дядька кывтис пыжөн берег дортыс да аддзис бёрдысь Витькаöс.

— Мый нö тэ ливзалан, муса пи?— юалис пыжа морт.

— То-о, то-о! Теплоходöй менам кывтис...

Пыжа морт видзөдліс ва вылö да збыльысь аддзис ва веркөсас кывтысь чачасö Витькалысь.

— Лок сөв менам пыжö өдйөджык да буксируйтам кыкөн,— нюмъөвтөмөн нин шуис дядька да босьтис детинкаöс пыжас.

Кор найö вөтөдісны Витькалысь судносö, дядька эз нин кöсйы бөр бергөдчыны ва паныдыс да шуис:

— Но вот, тэ өні чеччы татчö, босьт ассыд «фрегат-тö» да мун гортад, эсійö дзиръя пырыс пет, а визув вылö некор нин эн лэдз эсійöс.

Витька нем виччысьтөг веськаліс сэтчö, кытчö сійö сэтшöма синіс,— тöварнöй пристаньö!..

Тані сулалісны куим буксирнöй теплоход.

Витька эськö и воylvліс нин дядя Костя теплоход вылас, да өні оз нин помнит бура, кутшöм вылын ветлөдлө сылөн дядьыс. Юавны кодлыськö — поліс. Вермасны өд и татысь на зэв кокныыда вөтлыны. Медсясö нин поліс куритчысь тётяысь. Казялас кö, дзик тодмышкалас.

Медым некод эз аддзыв сійöс, Витька сайөдчис öти бöчка сайö да заводитіс тöдмавны дзик сы весьтын сулалысь теплоходсö. «Тайö али абу тайö?— падъяліс сійö.— Дядя Костя карö кайис, сы вотөдз кызкö колö пырны... Воас кö, оз лэдз транзистыскöд муннытö... Но тайö-ö сылөн теплоходыс? Вот Гөлик Сенька кö эськö тані вöлі, сійö эськö, небось, лыддис теплоход нимсö, а ме...»

Витька шогö уси сы вöсна, мый теплоходлысь нимсö лыддыны оз куж да и юавнысö некодлысь оз лысьт. Но друг дум вылас сылы уси: өд сылөн ичөтик пыж бокас батыс гижліс сійö жö теплоходлысь нимсö, кутшöм вылын ветлөдлө сылөн дядьыс...

Витька ляпкөдчыштіс, босьтис пидзöс вылас ассыс пыжсö да пондіс видзөдны букваяс вылас...

Сөмын на дасөдз сійө велаліс лыддыны, а букваяс-сө оз на ставсө төд.

— Менам — өтик... кык... куим... нель, а сэні гижө-ма: өтик, кык, куим, нель! Да и первой букваыс өткодь кыкнан теплоход бокас: өтилаөдөм кык кольча — «В»! Да и мөдыс сэтшөм кымын жө — «В», дзик крукыля бөдь кодь... Сідзкө, тайө и эм!

Тайөс и корсис сійө...

Витька гөгөр видзөдліс. Бөрйис сэтшөм здук, кор матросьясыс кутісны ноксыны кутшөмкө кыз гезьясөн, да звиркнитіс-кайис теплоход вылө...

«Вьюн» теплоход кывтіс Эжва кузя да ас бөрсаяс кыскис куим ыджыд баржа. Ва кывтчөсөд өдйө на и шпуритө-мунө. Бытгыө өні на и вөрзис кар пристаньясьянь, а со нин и Час улө воө!

Машинист Чикышевлөн смена помасис. Петіс машин-нөй отделениеысь да мөдөдчис аслас каюталань. Каютаө пыригөн нин паныдасис теплоходвывса матроскөд, коді киас кутіс ичөтик, плавкөс пыдөса чача — пыж... Шөрас ичөтик бөдьтор-мачтаө пысалөма бумага парус, йылас лөгьяліс гөрд флажок...

— Эй, Соловей! Тэныд нө кымын арөс нин тырис?— гажаа юаліс матрослысь машинист Чикышев.— Чача-ясөн на ворслывлан? Ха-ха-ха!

Соловей яндысьөмпырысь пондіс правдайтчыны:

— Да-а... вот муна теплоход нырө, мися, палубасө мыськышта... да лебөдка улысь тайөс аддзи... швабраөн на сайөдөма вөлі... А кызди татчөсө веськалөма, ог төд.

— Ог төд, ог төд. Миян судно вылын, буракө, челядь арлыдаыс некод абу. Ставыс нин петөмаөсь чачаөн ворсан арлыдсьыс...— сөрнитіс машинист да пондіс видлавны чачасө.

— А мичаа өд кодлөнкө вөчөма!— любуйтчис матрос.— Вот карө бөр воам, да племянниклы и пөдарита. Кутшөм любө лоө сылы!

Виччысьтөг теплоход нырын зэв яра пондіс увтны машинистлөн понйыс, ичөтик Пыстаыс.

— Пыста, Пыста! Лок татчө, лок! Ме дорө!— чукөс-тіс понсө машинист. А Пыста ещө на ёнджыка да яраджыка кутіс лявтны-увтны, кызд тай ура пуө увтысь пон дорө кутан матыстчыны, да сійө ёнджыка заводитө увтны.

— Да тэ нө мый? Йоймин али мый?— өлөдiс кӧзьяныс понсӧ.

Кыкнаныс мӧдӧдчисны теплоход нырлань.

Понйыс увтiс дзик теплоход нырас да крукыльтчӧмӧн исалис люксӧ, кодӧс речникъяс шуӧны форпикӧн. Форпикын видзӧны якӧр чепъяс да мый да.

Пыста дорӧ воалисны и мукӧд матросъяс. Кытшалiсны сийӧс. А Пыста аддзис локталӧмтӧ да нӧшта на ёнджыка ӧддзис, весиг лапаяснас гыжъялӧ люкыслысь дорышсӧ. Онӧ ӧмӧй пӧ гӧгӧрвоӧй, мыйын делӧыс?

Машинист копытчис люк вевт дорӧ да лӧптыштiс... Пемыдiнын, чепъяс кындзи, нинӧм оз тыдав. А Пыста дась нин вӧли кӧть ачыс чечыштны пемыдiнас — мырдӧн пырӧ...

— Да мый нӧ тайӧ татшӧмыс?— шензис машинист.— Шыть, Пыста! Ноко, Соловей! Пырав да видзӧдлы, мый сӧни сӧтшӧмыс...

Соловей лӧччис форпикӧ, да эз на удит сӧни бергӧдчыны, кыдзи чургӧдiс чуньсӧ:

— Тани кутшӧмкӧ детинка...

Детинкаӧс катӧдiсны, кыкисны форпикысь. Сылӧн нӧйтчӧм чужӧм вывсянныс видзӧдiсны унзиль синъяс. Сӧсся сийӧ нюмъевтiс да юалис:

— Тентюковӧдз нӧ ылын на? А кӧни нӧ менам дядя Костяыс?

Чукӧртчӧм йӧз видзӧдлiсны ӧта-мӧд выланыс. Мукӧдъясыс нюмъевтiсны. Сӧсся капитан матыстчис детинка дорӧ, малыштiс юрӧдыс да юалис:

— Кутшӧм дядя Костяӧс нӧ тэ, муса пи, юасян? Тани уна дядяыс эмӧсь, но некутшӧм дядя Костя абу... Тэ, гашкӧ, вӧтасин, дона пи?

— Кӧни нӧ дядя Костяыс?— гӧгӧр видзӧдлӧмӧн мӧдысь юалис Витька да бӧрддзис.— Тайӧ ӧд сылӧн теплоходыс... Ме сийӧс карысь аддзыли ачым, менам пӧ теплоходӧй сулалӧ пристань дорын, регыд пӧ мунам транзистӧн да баржӧясӧн... Сидзи и шуис сийӧ... транзистӧн пӧ.

Бара ставныс нюмъевтiсны, а машинист Чикышев юалис:

— А кутшӧм судно ылын нӧ ветлӧдлӧ тэнад дядя Костяыд? Теплоходыслысь нимсӧ он вермы висътавны?

Детинка збоймыштiс. Аддзӧ, мый сийӧс оз пинявны, оз ыждавны да и нюмъялӧны на ещӧ.



— Бабё эськё нимсё тёдё да...— думыштчёмён вочавидзис детина да сэсса содтіс:— но-о! Он ёмёй тёдёй менсьым бабсё? Сійёс Варвараён шуоны... Батьё ещö менам пыж бокö гижліс дядя Костя теплоходлысь нимсё...

И друг дум вылас уси сылөн чачаыс, да Витя нем виччысьтөг пондіс пырны бөр форпикö. Но Витькалы пырны эз сетны, весиг Пыста кокныдика кутчысьліс гач кокас. Кытчö нö пö пыран, ме пö нин тэнö корси да?

Матросьяс гөгөрвоисны, мый сійö корсьö, да вайисны сылысь ичотик пыжсö.

— Но вот, ме татчö пыригөн на лыдди: тіян теплоход бокас гижёма нель буква. И менам сы мында жö... Ме өд дасөдз кужа нин чунь вылын лыддыны... мамёй велөдліс,— гөгөрвоөдіс детинка.

— Кыдзи нö тэнö шуоны, том молодец?— юалис капитан.

— Витькаён,— вочавидзис зонка.

— Тэ прав, Витя! Кыкнанас гижёма нель букваён. Но тэнад гижёма «Вымь», а миян теплоходлөн нимыс «Вьюн»...— меліа висьталіс капитан.

Витька паськыджыка восьтіс гөгөрвотём синъяссö.

Витькаёс «Вьюн» вылын вердыштісны, юкталыштісны пöсь чайён. Сэки вөлисти төдмалісны, кызди детинкаыс веськаліс форпикас.

Вөлөмкө, Витькалөн батыс төдса теплоходыввуса пöшти став командаыслы. Сылөн батыс, Василий Сырчиков, ветлөдлывлёма коркө тайö жö судно вылас матросён, да капитаныс машинистыскөд сійёс помнитöны зэв бура. Öні Витькалөн батыс уджалö суднояс ремонтируйтан мастерскöйын — сійёс бара жö төдöны. Сійö, мастер мортыд, неважён и тайö судносö дөмөма, бокас вөлі артмөма розь да... А öні вот сылөн, Василий Степановичлөн, пиыс «өшыбкаён» веськалөма тайö теплоход вылас. А сійö, батыс, көнкө, корсьö, местасö оз аддзы.

Капитан шуис Витькаёс бергөдны гортас первой жö воча катысь пассажирскöй теплоход вылын. Но мөдөдны өтнассö бара жö абу надёжнö. Код төдас, гоас-ö гортөдзыс...

— Николай Григорьевич,— шыасис Соловей, коді вөлі комсоргөн да кодөс аслас гажа да серамбана характер вөснаыс нимтылісны «Соловейён».— Вай ме колльода! Колльода и лучки-ладнө кыысь киö сета детинкасö

шогсыысь бать-мамлы! Ме аски жö сійö теплоходнас тiянöс суöда.

Капитан сетiс команда — лэдзны пыж да лöсьöдчыны Соловейлы öти матроскöд петны катысь теплоходлы паныд. Ачыс жутис сетавны сигналъяс.

Катысь теплоход «Виктор Савин» вочавидзис аслас сирена шыön, ньöжмöдiс мунан öдсö да босьтис аслас борт вылö виччысьтöм пассажиръясöс.

Витькалөн бать-мамыс, милициякöд тшöтш, мöдöд сутки нин корсысьöны ассыныс пинысö. Корсисны став матiгöгöрса посёлөкъясысь, ветлöдлiсны ва дор пöлөн да медбöрын пристань дорöдз воисны...

«Виктор Савин» сувтис пристань дорö да пондiс лэдзавны воысь йöзöс. Ставыс нин петалисны теплоход вылысь, колисны сöмын öтка-öтка петысьяс... Тöдса некод абу... Но кор нин шудтöм бать-мам юрнысö öшöдöмөн мöдöдчисны бөр гортланыс, друг бөрвывсянныс кылисны:

— Ма-ма! Ма-ма! Ме тани! Энö кольöй менö...

Бать-мам бергöдчисны да чуймисны: Витька, налөн детинкаыс, киняулас паруса ичöтик пыжсö топöдöмөн, ыджыд восьласөн локтö налань, а сы мышкын вöтчысь том морт мыйкö зэв нин ёна нюмъялис.

Тайö вöли «кузь туйö петалысь» Витькаöс колльöдысь Соловей.

— Василий Степанович! Вайöдi питö! Капитан Кушманов тшöктiс висьтавны пöсь чолөм, медым пö писö быть велöдас речникö!— гажаа рапортуйтiс Соловей.

Василий Степанович тöдiс ассыс важ тöдсасö, кватитiс да окалис Соловейöс, сэсся писö, да сэтшöма нормис сылөн сёлöмыс, мый окалис тшöтш дзик бокöвöй öти старикöс, кодi матын сулалöмөн видзöдiс на вылö.

Пöль шай-паймунис да тожö пондiс синвасö чышкавны...

— Кодi нö тайö детинкаыс? Кытчö ветлис?— юасис пöль.

— Тайö? Тайö, дед, Виктор Васильевич Сырчиков! Регыд лоас теплоходвывса капитанөн. Ветлис практика выдö,— шпыньмунöмөн висьталiс матрос.— А миян капитаным нöшта на тшöктiс висьтавны, медым пö пиныд, Василий Степанович, бурджыка велöдчас лыддысьны...

Ачыс видзöдлiс Витька вылö, кодöс вöли топöдöма ас бердас мамыс, да мигнитiс сылы.



МИРОН ДЕДЛӨН ВИСЬТ

— Дедө, дедуш! Тэ важөн нин вөлі косьян мойдыштны миянлы!— Мирон дедлөн кык внук, Вова да Степук, кōласисны сы дорө. Сёр рыт жө нин эськө, да оз на узьсы, тыдалө, челядыдлы.

— А урокъяснытө вөчөма нин тиянлөн?— юалис дед.

— Көть өні петкөд дөска дорө!— смела висьталіс Вова, коді вөлі велөдчө нельөд классын.

— Ті өд, муса пиян, мойдъяссө меысь унджык нин төданныд. Төданныд и Ёма-бабаөс, и Көрт ныра воробей-өс... Мый ме тиянлы мойда? Öні тиянлы весиг школаас мойдъяссө велөдөны. А вот миян арлыдаяс велөдчывлім да овлім мөд ногөн. Öні өд ставыс тиянлы дась: и школаыд югыд, и велөдчан көлуйыд, и көм-пасыыд мед эм. А школа бөртиыд онө на зэв косъяснытө чегъялөй, майбыр.

Бөръя кывъяссө дед шуис кызкө быттө скөрысь-кодь нин.

— Ми вот важөн велөдчывлім да овлім, сы йылысь оз мешайт висьталыштны-мойдыштны. Вот, колөкө, и

висьтала өти дед йылысь. Но да өд деднас лоис бөрын-джык, а сэки детинка на вөлі...

— Висьтав, висьтав, дедушка!— өттшөтш шыасисны челядь.

— Но, сідзкө, кывзöй да менö энö торкалöй...— шуис дед да заводитіс висьтавны:

«Тима быдмис раминик детинкаөн. Квайт арөссиянь ковмис кага видзны. Видзис ассьыс чой-воксö. Бать-мамыс мунасны лунтыр кежлö видзьяс вылö, а ичөтик Тимаөс колясны томан сайö, гортас... Петнытö оз позь, да он и вермы! Қызди нö томан сайысь писькөдчан?

А луньясыс! Луньясыс кутшөм гажаясь! Сусед челядь ворсöны öшинь улын. Налы дивья, кагаыд абу да... Найö и купайтчынытö ветласны, и öнью-гөньютö, и шомкортö өктöны, а тэ öшинь пырыд и кыйкьяв, ветлөдлы өти öшиньысь мөдö. Дерт, корсюрö и удайтчывлас уйкнитны-петавны, кор мам-бать воасны гортö, сөйөм ни юөм, мед сөмын усыйсыны ывлаө өдйөджык!..

Коркө өтчид Тималөн первой другыс, Савать Яков, коді ачыс вөлі кага видзö Ыджыд Иванлысь, медасьöмөн, дерт, локтіс Тима öшинь улö да ышөдіс сійөс петавны öшиньюдыс... Вөлөма на тай челядьдылөн сэтчө мывкыдыд!

Öшинь вөлі воссяна. Челядь кыськө кыскисны кер лэдзан важ ичөт додь, сувтөдісны öшинь весьтö да и лоис прамöй пос! Таті дивья нин тювкысьнытö! Тима ичөтик воыскөд, Сашöыскөд, тюрөбтісны-петісны вөля вылö.

Ок, кутшөм вөлі рад! Гожөм, шоньд и бать-мам абуось... Кутысь ни пыкысь! Вөч, мый колö челядь лолыдлы!

Ставөн лэччисны Моя ты дорö купайтчыны. Берегыс зэв лөсьыд, лыа. Қытчö лэччисны челядь, тайö местасö шуöны «Мөс юанінөн». Шуöны сы вөсна, мый тані гоҗся кадö юöны мөсьяс, а лөддза-номья дырйи келасны ваас да сідзи и сулалöны лунтыр. Сэсся гортаныс локтасны, дерт, тшыгось.

Челядь вөтлісны-петкөдісны мөсьясөс ваысь да асьныс мөдісны бультікасьны.

Тимаыд ассьыс воксö, Сашасö, кодлы вөлі на сөмын нель арөс, сідз жö пөрччөдіс, ачыс өддзөдчөмөн шыбитчис ваö...

Медым уялігад өдйөджык водзö воан, челядьлөн лөсьөдөма аслыс пөлөс лопьяс. Тайö неыджыд пөвтор, кивомлөс пасьта да килутш кузя, а кызди тай мый вын-

сьыд швыркнитан ваас кыкнан кинад, сыв джын уйкнитан — водзё воан! Татшөм уялансё быд челядь аслыс лосьодёма, а откымынлөн нөшта и краситёма на. Гортё тайё пөвторъяссё оз новлөдлыны, а дзевлалёны лыа пытшкё, ва дорас жё.

Тималён вөлі татшөм жё лоптыс, да пырысьтөм-пыр жё и ты шөрөдзыс воис.

Но регыд ковмис сылы өвсьыны кельчи моз тювкъя-лёмсьыд...

Берегсянь кутисны челядь горзыны: «Тима-а! Сашёйд вөйё! Сашёйд!»

И збыльсь, төкөтьё эз ло неминуча. Тималён вокыс, Сашёйс, сөмын вермё кияссё чургөдлыны ва веркөсас, а юрыс оз нин мыччысьлы...

Но шудыд вылө сійё кадё Сашё дінын матынджык веськалёма медся ыджыд детинкаыс, Опонь Васька, да сійё сунавлөмөн кыскёма детинкасё юрсиёдыс, а то эськё Тималён вокыс ва пыдөсас и коли...

Көть эськё челядь и көсийсьлісны Тима бать-мамлы не висьтавыны та йылысь, но вөлёма тай кодкё кальөг вомаыд.

Та бөрти Тималы вокыскөд ковмис гожсьыны нөшта на ыджыд томан сайын.

Важөн гөль крестьяна пөвстад грамотнөй мортыд зэв этша вөлі, но Тималён батыс, Опонасей Иванович, вөлі неуна лыддысьыштё. Лыддысьнысё сійёс велөдлёма батыс, Тималён дедыс, коді кызь вит во служитлёма салдатын да кызкё велөдчывлёма лыддысьны. Тима нин батыслысь велалёма букваыстё төдны. Быд кок пөв йылын көвьясьё батыс дорё: петкөдлы да петкөдлы, висьтав да висьтав, кыззи шусьё тайё гөгылыс, кыззи шусьё тайё крукыля-мукуляыс. Бать некор оз откажитлы пиыслы. Квайт арөсё воигөн нин Тима төдліс став роч шыпасьяссё.

Важөн учебникъясыд эз вөвны, да батыслы ковмис шыпасьяссё петкөдлыны газетьяс вылысь. Учебниксё дедыс синнас эз аддзыв, батыс абу аддзылёма и пиыс со велөдчө учебниктөг...

Опонасей Иванович ачыс вөлі прөстөй, гөль крестьянин, и вывті лют вөлёма велөдчөм вылад, йөз кост олём да природа гөдмалём вылө.

Отчыд Тималён батыс кыліс пөлать подлөсын лыд-

дбысьом. Вёлөмкө Тима лыддьо стенө клеитөм газетысь:
«Пор-т-а р-тур».

Батыс кыліс тайо лыддысьомсө да ёна и радліс-
ошкис Тимаос:

— Вот тэ өні грамотной морт нин! Локтан во сета
школао.

Но школао сетөм эз артмы. Тималөн бара лоис ви-
дзантор — Василей вок... И мамыс сідзи шуис:

— Велөдчөм оз и ков! Видз кага и нинөм думайтны
школа йылысь!

— А ме эськө пышйи гортысь, мам кө быттьо эз
лэдз!— шыасис зэв сьөлөмсяньыс кывзысь Вова.

— Өти-кө, ме тиянөс өлөдлі, мися, меным не тор-
кавны, а мөд-кө, кытчө нө пышьян? Сэки өнія моз ин-
тернатъясид эз вөвны! А сэсся мый гөгөрволісны негра-
мотной бабаясыд! А Тималөн мамыс вөлі дзурс пемыд
нывбаба. Төдлісны сөмын сьөкыд удж: нянь вөдитөм,
турун пунктөм, пес кералөм, пыш вөчөм, зуасьом, печкөм,
кипом вурсьом, чөрөс-кепысь кыөм...

Коркө, аръявыв нин, кор Тималы тырис көкъямыс
арөс, ыджыдджык чойыс нуөдліс Пожъян сиктө, вичкөо,
да өбедня бөрас пөпуттьо пыралісны учительница ордө,
Аполинария Ивановна ордө, коді оліс школаас жө. Ку-
тісны сылы норасыны чоя-вока, мый вот эськө пырны
велөдчыны, а ичөт вокыс оз лэдз, колө сійөс видзны...

Учительница сералігмоз шуис:

— Гырийө сійөс суй, гырийө — ичөт воктө!

Тима шогпырысь воис гортас да висьталіс мамыслы,
а мамыс кывзыны оз көсйи школао пырөм йылысь.

Вөчны вөлі нинөм. И ковмис эськө Тималы төвйыны
бара гортас, да, кыз шуасны, шудыс эськө эз вөв, да
неминуча отсаліс. Видзанторйыс — ичөт вокыс — биа ви-
сьомөн висьмис да кулыштіс. Кыз тай шуасны важ йөз:
ловсө ен босьтыштіс...

Тималы, өти-кө, и вокыс жаль, ёна бөрдіс, а, мөд-кө,
воссис туй велөдчыны... Мамыс сійөс нуөдіс школао
нөль верст сайо да коліс учительница ордө.

Колө шуны, мый учительница Аполинария Ивановна
вөлі бур сьөлөма. Оліс, велөдіс, дөвуйтіс. Висьтавліс,
мый мужикыс вөлөма учитель жө, мый урадниккөд пи-
нясьомысь вөтлылөмаось удж вывсьыс, кувлөма важөн
кодь нин. Кыз өтиыс, сідзи и мөдыс ёна старайтчылө-
маось велөдны гөль йөз пытшкысь петөм челядтьө.

Школаыс, көні заводитіс велөдчыны Тима, шусьыліс церковно-приходскöй. Сулаліс вичкобердса кладбище дорын, важмөм здание нин.

Öти класснöй жырыын велөдчöны куимнан отделе-ниеыс. Сэки шусьывлісны эз классъясөн, а отделение-ясөн: младшöй, среднöй, старшöй отделениеяс. Öти учительница и велөдіс куимнан отделениесö. Школаас юралысьнас лыддысьыліс поп, инспекторнас — карса вич-коысь благочиннöй, прөстöя кө шуны — ыджыдджык чи-на поп.

Быд вөскресеннö быть петкөдлöны вичкоö. Сувтöда-ласны радөн-радөн да и сулалан служба чöжыс.

— Быттьö пионерскöй линейка вылын?— юаліс Вова.

— Хе-хе! Пионерскöй линейка вылас сулалан да тö-дан, мыйла тэ сэнi сулалан! Тэ дасьтысян лоны достой-нöй сменаөн комсомоллы, партиялы! А танi он тöд мый сулалөм и сулалан! Мый сьылöны, нинөм он гөгөрво, а кор гөгөрвоан, ставыс сійö...

— ...ылөдлөм!— мыччысис Степук.

— Вот, вот! Ылөдлөм и эм!— шуис Мирон дед.— А öд сулалөмыс на ещö кутшөм? Вичкоса ладан дукуыс да пöсьыс вöсна лолавнытö нинөмөн..., кокъясыд челядь-ыдлөн дубалөмаөсь и мудзөмаөсь. Бурджык велөдчысь-яссö старшöй отделениеысь тшөктöны ещö сьывны вичко кырлөс вылын. Тима тшөкыдакөд сьывывліс жö. Кырлөс вылын сьывлісны сöмын мужичöйяс «слук сер-ти». Но «гласысь» кө кежыштан, юр пыдöсад пыр и колскасны. Регент пыддиыс вöлі öти сьылысь, шуисны сійöс Стапö Васьöөн. Ена жö сійö вöлі скөр да лөк. Тима унаысь сы вылө норасьывліс; коркө кө пö волас миян сиктö, ме сылы паличөн гымга-лыя.

Школаын тшөкыда ворслывлісны, кызди и ворслыв-ланныд, войнаысь, а сы вöсна, мый челядь некутшөм фактыяс историясьыс эз тöдлыны, быть ковмис примеръ-яссö босьтны священнöй историяысь. Тшөкыда челядь ворслывлісны, кызди ичөтик тушаа том морт Давыд вермаліс багатыр Голиафöс. Старшöй класса велөдчысь Мить Вась тушанас медыджыд да сійö пыр ворсліс тайö Голиаф пыддиыс. Сувтас перемена дырйи öдзöс дорö, кутчыяс öдзöс вугъяс да корö челядьöс чужъявны. Че-лядьыд исерга моз кыталасны сійöс да быдөн эськө зильöны чужйыны сылы, а сійö öтчюд и чужъяс да пась-кыд прөсека кольö...

Учительница Аполинария Ивановна олома нин, велодома нин комын во. Ачыс кузь тушаа, кузь ныра, вёсни коска да новліс мыйлако пыр съод платтьо. А гөлөсыс на кутшом! Чиростас да, небось, кылан верст сайсянь! Пель пырыд петас. Урокто ко он велод, регыд на и пельбосо сувтодас, а то и пидзос вылад на ещо! Коть и любито челядьто, но строг воли, нином и шуны! Сэки коминад эз сетны сёрнитныто, урокыд роч кыв вылын. Весиг, ковмас ко ывлао петавны урок шорад (од мыйыс оз вермы лоны челядьдылдон), юасян рочон жо, а вопросыслысь вежортассо он и тод, мыйко тай, примерно, сидзи лоо-а: «позвоте пискоди». Мичаа ко висьтавыны, лоо: «позвольте пить сходить».

Тима оліс учительница ордын эз отнас Номпоз сиктысь. Сыкод ещо олісны куим велодчысь да узылісны кор классын, а кор учительница ордын, ичотик жырьяс, джоджын, дерт.

Комнатаыс кодзыд кодь, керкаыс, мися, важ нин да. Водаласны орчон нельнаныс ыж ку лась выло, шоныджык узынысо. Ассыныс вольпасьсо вольсавлісны комната пач вом весьтас, медым очередьон позис кокьяснысо суйлыны пач вомас. Учительницадон воли зев ыджыд пон, Ральфик нима, лосьодлома пиыслон, коди товнас велодчис Варшаваса университетын. Кор Ральфиклы кодзыджык, тшотш пыро комнатао да водо «квартирантьяс» дорю, ещо и шебрас улад на пырас.

Сейоны-юоны воли классын партаяс вылас либо учительша пызан вылас, дерт, урокьяс борас.

Сеянсо ваявлісны гортсяныс вежон кежло. Мамьясыс мододлісны челядьнысо туесьясон да кузовьясон. Сейигад рысь туесто сувтодасны пызан вылад, гогорыс пуксяласны да веськыда туессыс и панялоны кузь голяя турияс моз, кытчодз оз потны...

Отчыд нель друг, урокьяс борын, босьталісны паньяс да няняс, пуксялісны туес гогор. Корисны тшотш и учительницалысь писо, Толяос, коди велодчис старшой отделениен нин.

Первойсо эсько и зев гажаа да отсогласон сейисны, а сесся Толялысь, вильышпозийдысь, Яша нима детинка казялома, мый рысьсо сийо ена киськало пызан вылас. Рыськыс жаль лоома, сы ылнасянь ас вылын кыскома да, колс кучкис паньнас Толялы плешкас.

— Эн киськав рысьсо! — шуис Яша.

Толя бёрддзис:

— Мый косясян!? Мамлы висьтала-а!

Тима повзьыштис учительница-мамыдлы удтёмсьыд да кёсйис небзьёдны ёсьмыны заводитём зыксё, петкөдлыны, мый абу быть бёрдны татшөм колскыштёмсьыд:

— Но мый нө татшөмтор вөснаыс лимзалан, Толька? Со вот ме кутшөма лөсышта Санькалы (тадзи шуисны Номпоз сиктысь өти велөдчысь нывкаөс), весиг пельсө сійө оз лапнитлы!— шуис Тима да паньнас тшолкнитис плешкас Санялы.

Саня равөстис-бёрддзис — ош улын моз — став школа пасьтаыс.

Челядь рысь туестө эновтисны да ставныс кутисны бёрдны — коді доймөмысла, коді забеднө вөсна, коді повзьём вөсна, а коді и прөстө сідзи.

Тайө «концертсө» аслас комнатасянь кыліс Аполинария Ивановна да пөжар вылө моз, ассьыс кузь платтьөсө лэптыштөмөн, медым оз джөмды, уськөдчис челядьлөн «столөвөйө».

— Мый нин тайө? Мый, сё бласлө кристос!?— повзьёмпырысь юалис учительница.

— Менө сійө...

— Менө этійө...

— Менө эсійө!..— кутисны норасыны өта-мөд выланыс рысь туес гөгөр пукалысь челядь.

Аполинария Ивановна нинөм эз гөгөрво, да и сьөкыд вөлі гөгөрвонысө. Сійө ёнасө эз кут разбирайтчыны:

— Босьтөй рысь туеснытө, паньястө, няньястө пызан вывсьыс да ставныд сувтөй час кежлө пидзөс вылө! Марш!

Челядь бёрдөмсорөн, паньяс да няньяс, рысь туес моздорас босьтөмөн, сувталисны класс джодж шөрө, а учительница пуксис пызан сайө, босьтис челядьлысь письменнөй уджъяснысө да места вылысь вөрзьывтөг караулитис, медым челядь сулалисны ассьыныс срокнысө «уостав серти».

Колө шуны, мамыс Толяөс, дерт, эляммөдыштөма да велөдчис сідз-тадзджык. А мыйсө сійө эз вөчлывлы гортас, кор мамыс мунас рытйысьны поп ордө либө фельшер ордө! Сэки челядьлы и койташ вөвлі! Мыйсө найө оз вөчны урокъястө велөдөм бөрын! Отчыд Толя, коді радейтліс юрсисө новлыны «ёжикөн», юрсисө мавтис варенньөөн, некыдзи юрсисыс оз сувт да! А аскинас «Закон

божий» велөдтөмысь Петыр поп линейкасö чегис вареннөөн мавтөм юр вылас.

Церковно-приходскöй школа Тима помаліс бура. Став оценкаыс «пять». Сөмын сьылөмысь шняпкөмаоьс «четыре». Экзаменсö нуөдө дзонь комиссия, да мортыд повзёома, гласыс өтилагын абу артмөма...

Школа помалөм бөрын Тималөн батыс тшөктіс пиыслы лөсьөдчыны водзö велөдчөм вылө да сійө жө во-нас, арнас нин, нуөдіс карө. Батыс Тимакод вөліс весиг гимназияса директор ордын квартираас, но найөс төкө-төь эз тодмышкавны. Быд лапотник кө пө ме ордө, квартираө, кутас локны, менсьым пө юрөс орөдасны...

Сідзи и лои водзö велөдчыны пыртөм. Ая-пиа бөр воисны гортаныс, сиктө. Тималөн мамыс вывті рад, мый пиыс бөр воис гортас. Öні позьö турун пунктөм помавны. И Тима да батыс мунісны ылыса видзьяс вылө. Турун пунктөмыс налөн зэра арнас помасис «покров» рытьяө, а выль ногөн кө, октябрь дас нельөд лунө. Войяс вөлі-ны көдзыдөсь нин. Вөлі и сідз, мый Тималөн батыс куртө, а сійө ислалө йи вылын куранөн и быдөн...

* * *

— Но мый нө? Велөдчөм тэнад эз ло, Тимопей! Ков-мас отсасьны овмөс гөгөр. Тэ менам ыджыдджык пи,— өтчыд висьталіс Опонасей Иванович.— Вай жө заводитам кызкө најөвитчыны! Заводитам көть пес пилитны да вузавлыны Эжва вывті ветлысь пароходьяслы. Мый-та вермам вөчыштны — сійө и бур. Некод миянөс оз тэрмөдлы, кынөмысь кындзи. Тэ нин абу ичөт, пила помтө кыскавны верман нин да и Воронко вылад верман кыскасьны. Воронкоыд миян өн, сөмын додөтө сөвт да ректы, ректы да сөвт...

Пес дорын уджалісны ыджыдджык чойыскөд. Пес пилитісны яг вылын да кыскалісны Эжва дорө.

Төвнад кын путө пилитан-пилитан, да чуркаыд некыз оз ор... Ёна ковмыліс и лымйөд собавны-келавны. Мукөд дырйиыс лым пыткад пыран, да юрид сөмын тыдалө. Сэки пестө пилитлісны и поткөдлісны найө веськыда мыр дорас и кыскавлісны нин поткөдлөмөн, пу додьясөн. Тшөкыда овывліс: пес доддыд шыбельө пөрө, лэптыны он вермы дас арөса детинкаыд да ковмас



додьтö ректыны да выльысь сöвтны... Чойыс да батыс ылынöсь, кöнкö пöрöдчöны мöдлаын. Коди сэсся вöрад отсалас додьтö лэптыны?

Тулысланьыс нин Тималөн батыс уджаліс гортас, сöмын кадысь кадö воylvліс пес дорö, а чоя-вока олісны, пароходьяслы вузавлытöдз караулитöны, лэччöдлöны моздорөн да нöсилкаяс вылын Эжва берег бужöд улас, медым пароходьясыслы вöлі матынджык пыртлынысö. Узьлісны вөр пывсянын.

Кöсйис Опонасей Иванович најöвитыштны пароход пес вылын, кöсйис и пьянсö водзö да бурджыка велöдны, но неминучаыд суліс жö на... Кыті пö тай вöсни, сэтi и орö. Од төвбыдөн Опонасей Иванович челядьыскöд пöрöдіс, пилитіс, кыскаліс вöрысь ва дорöдз зэв уна кубометр пароход пес, а вузавнысö эз ставсö удит.

— А мукöд пескыс?— бара юаліс Степук.

— Кайис тшын йылö!..

— Кыдзи тшын йылö?— юаліс Вова.

— А сідз тай, быдмысь войтыр... Öтчыд Тима төкөтъя на удитöма мунны пес катище вывсьыс, кыдзи челядь чукөр биасьямаöсь ягас... Ягыс кос поводдя дырйиыд öзйöма да ипес чипасьясöдзид воöма биыд... Сотчис унакодья пароход пес! Мыйта воши удж! Уна мырсöмыс тшын йылö кайис... Ас трудөн, ас сой вечикөн вöчөм пес! Сійö воясö тайö эськö вöлі ыджыд отсöг семьяыдлы.

Тадзи помасис Тималөн челядьдырся олөм, и öні на казътывлö Тимофей Афанасьевич ассьыс учительница Аполинаррия Ивановна Буткинаöс да рысь туес дорын пидзöс вылын сулалөм».

— Сідзкö, öні на ловья сійö?— юаліс Вова.


— А кöні нö öні сійö?— содтöд юаліс Степук.

— Сійö?..— шуис юалөмөн моз Мирон дед.— Со тай сійö.— И дед индіс ас вылас, морöсас тувкис, синсö читкыртліс да дзор ус пырыс неуна нюмъявтiс.

— Сідзкö, детинкасö эз Тимаөн шуны, а Миронөн?— юаліс Степук.

— Тайö ачыд и вөлөмыд да,— радлігтыр шуис Вова.

— Сідз тай, буракö, быдмысь войтыр. Ачым...



АБУ ВУНОДОМАЎСЬ...

Отчыд менё мамё ыстіс юбокса раскё гёлик росла. Ачыс уджаліс совхозса птицефермаын.

— Ветлы, піё, гёлик росла! Дзик нинёмён чышкыштны курёг-петуклысь оланінсё. Коть гоз-мёд рос вай!— велёдіс мамё.— Сёмын мед кыз рос вёлі, кыз рос! Қылан? Баддьыд оз шогмы. Қытшовт ыліджык да аддзан.

Ме эг ю бокё мун, а мёдөдчи өти вад бокё, кодөс вёлі шуёны Гөгрөс вадйөн.

Сёмын на заводиті руза-разақывны вад бокын да чегъявны гёлик россё, другысь кыла: «Жбыр-р! Жбыр-р!» ...Дзик менам кок улысь пура-парақылөмөн лэбзис зэв ыджыд дзодзөг. Ме төкөтьё кок йылысь эг усь, сэтшөма повзи! Эк! Ена жё жалиті, мыйла батылысь пищальсё эг босьт. Вот эськё вёлі и дзодзөг яй!..

А дзодзөгыд, быттьё нарошнё, качөдчис да кутіс бергавны менам юр весьтын. Быттьё менё дэльөдіс: абу пө кужөмыд овнытө, муса другөй! Со пө ме көні! Лый пө колөкө-а! А менам кыин весиг палычтор эз лөсяв... Ак, мися, вёлі кө эськё батылөн двустволкаыс, эн жё сәні дыр көвкъяв да.

Дзодзөг бергалө и бергалө юр весьтын... Мый, мися, талы колө? Али менө на пыр эльтө? Сэссия друг юрө воис батылөн висьталөмыс... Ай дзодзөгид пө видзө энъ дзодзөгсө, кор сийө пукалө аслас поз вылас, пөжө ассыс колькьяссө...

Ме пукси куст сайө да куті кыйөдны — мый лоө водзө. Пукала, а дзодзөг гөгөртас да бара лэбзылас дзик менам юр весьтти... Ме и думышти: дзик, мися, тані көнкө эм поз вылас пукалысь энъ дзодзөг.

Но көні пукалө, стөчасө од он төд.

Пукалі-пукалі да и дөзмытөдз нин лои. Од мамө менө ыстыліс здук кежлө, нарадитіс не сөрмөдчыны. Но, мөдарө кө шуны, кыдзи нө поэьэ энотны татшөмторсө?

Корсьыси-уялі, став дөрөм-гачөс няйтөсьті... А дзодзөг оз көсийэ энотны тайө местасө: лэблас кытчөкө неылө, бара бергөдчылас да бергалас, и пуксьыны оз пуксьы...

Медбөрын няйт комөк кодь мөдөдчи ва дорлань, мися, көть гач пидзөсьясөс неуна пожъевта, мед мамө ёна оз видчы.

Эг на удит воны ва дорөдзыс, кыдзи бара дрөгниті... Кык воськов сайын, веськыдладорысь лэбзис бара зэв ыджыд дзодзөг. Тайө и вөлөма дзодзөг-мамыс, а сэссия регыд мысти жө аддзи дзоридз пөвстысь и дзодзөг позсө...

Позйын вөлі кык дзодзөг кольк... Мый вөчны? И дзодзөг-мамыс жаль — и кольксө окота босьтны... Зэв нин гырысьөсь.

Радлөмвывсьыд менам и гөлик роскыд вуні. Колькьяссө шапкаө пукті да кык гөлик тыр рос чегйышти. Одйөджык мөдөдчи гортө, мам дорө.

Ощйысьөмпырысь петкөдлі мамлы. Мися, сийө радлыны кутас, а сийө менө сэтшөма пиняліс, мый абу рад и дзодзөг кольк корсьөмыдлы.

Мамө пиняліс куимторйысь: өти-кө, мыйла рос этша вайи, мөд-кө, мыйла татшөм няйт сюръя кодь локті, а коймөд-кө, мыйла рөзөриті дзодзөг-мамөс.

— Ну бөр да пукты, кытысь босьтін колькьяссө! — видчө мамө.

Мый вөчны? Кытчө воштыны дзодзөг колькьяс? Көть пуксьы да ачыд пөж... Кытысь сийө местасө өні аддзан, көть и бөр нуан? Кытчөсюрөтө пуктан да ещө ёсь пиня да кузь бөжа крысаяс сөмчитасны дай...

— А мый, мамö! Вай пуктам колькъястö кутшöмкö пöжсьыс курöг улö, тэнад öд фермаад уна сэтшöмыс эм. А курöгылды öд öткодь, медым сöмын кольк вöлі-а...

— Кытчö нö ме сійöс пукта? Ставыс öнi инкубатор-нöй да...— висьталіс мам.

— Пукты асланым курöггъяс улö,— эг сетчы ме.— Эм тай налы оланіныс...

Мам муртса сöгласитчис, да и ми пуктiм асланым öти пöжсьыс курöг улö дзодзöг колькъяссö.

Гöгөрвоис-ö курöг-мам, ме ог тöд, но пукавны колькъяс вылын кутіс зэв сьöлөмсяныс. Ми сы улö пуктiм нель кольк, на пиыс кыкыс дзодзöггъяслөн.

Курöглөн пукалөм прöста эз вош. Регыд кутісны колькъяс потласьны да петавны сэтыс чипанпиян.

Но дзодзöг колькъяс оз потласьны... Чипанпиян нин чипсалöны, котралöны, а курöг-мамлы кöть шöри орöдчы: и дзодзöг колькъястö колö пöжны, и дöзьöритны чипанпиянтö. Мам менö видö:

— Да дыр-ö нö тайöясöс ковмас пукöдны? Курöгыслөн нин лыыс да куыс сöмын коли!..

Сэсся жорккö петісны жö и дзодзöг пиян.

Кольк кыш пытшкыс петöм бöрын курöг-мамлөн лоины бара выльпөлöс тöждысьöмъяс. Чипанпиянкöд дзодзöггъясид эз овмöдчыны, кыз шуасны, «вирыс эз лöсъяв». Öтиясыс «сухопутнöйöсь», а мöдъясыс дзик водолазъяс кодьöсь — мырдыс ваö пырöны. Коньöр курöг-мамлы бара кöть шöри орöдчы. Ва дорын сулалö да котсьö, корö петны васьыс, а дзодзöгпиянлы веськодь: сунласны да бара, сунласны да бара. Курöг-мам, дерт нин, полö вöйöмысь...

Ёна ковмис и меным ноксьыны дзодзöгпиянкöд. Вердны-юктавны, а медбöрын дзикöдз торйöдны да видзны торъя местаын. Весиг петукъяс кутісны öтдортны менсьым быдтасьясöс. Но ме öбидитны найöс эг сетлы.

Сідзи и быдмисны да мичаммисны дзодзöг гоз, кöть картина вылö рисуйт. Öтиыс вöлі ай дзодзöг, а мöдыс — энь. Ме бöрся вöлі вöтлысьöны дзик понпиян моз, мед сöмын кылісны гөлöсöс... Локтасны вöлі ме дінö да зурк люкаласны менсьым пидзöсöс: вай пö нин сёйны, кöзьян!

Менам быдтасьясыд олісны нин арöдз. Öтчыл петкöді дзодзöг гозйöс гуляйтны двор сайöдз, эжа вылö. Ветлöдлам, гуляйтам. Найö веж турун йывъяс йирöны. Сэсся

друг кыліс сынодас готсьом шы... Видзёда да, лэбёны дзодзёг чукор да зэв ёна горзёны ли сылёны ли — коді тодас налысь.

Менам дзодзёггяс лэптисны юрнысё, сыляяснысё нюжодисны да и бордгяснас пөв-мөдысь клопнитисны...

— Но, но! Энө зэв чатрасьёй, а то ме регыд на и дугёда прогулканятө!— грөзитышти ме.

Эг на удит помавны ассыым көсийсьёмөс, кызди менам быдтасьясөй готкыштісны да... качөдчисны сынөдө...

Ещё и ещё! Вывлань да вывлань... Сэсся өтчыд меланьё юрнысё бергөдлісны да бара на готкыштісны: прөщайтлы пө, миян вердысь-удысьёй, пасибө пө тэныд быд бурсысь!

Ме первойсө думышти, мися, тайёяс дурёны, упражняйтчөны, а найө век вывланьё и вывланьё...

Эг удит кыв шуны ни киён өвтыштны, прөщайтчыны, кызди менам другьясыд өтлаасисны ылі муө-ваө лэбысь-яскөд...

Коли өтнам птицеферма эжа вылө. Ёна и шогси, а сэсся дыр мысти вунөді жө ассыым быдтасьясөс, көть и жаль вөлі...

Колис ар, вөліс төв, бара нин матысмис тулыс, гажа тулыс! Кутісны воавны и тувсов пөткаяс. Өтчыд менсьым мамө юалө:

— Вовик, таво, гашкө, бара кутан быдтысьны да?

А өти класса велөдчысь, медматысса другөй, весиг эльөдліс менө:

— Мый нин дзодзёг батыс вөчлывлө? Кымын дзодзёг таво көсьян быдтыны?


Шуны нинөм. Чөв ола.

Но бара на лои сэтшөмтор, мый менам думьясөй дзикөдз вежсисны дзодзёггяс дорө.

Өтчыд, асывводзын, мамө менө ыстис восьтыны ферма өдзөс да лэдзавны сэтысь став курөг-петуксө ферма дворас пальөдчыны.

И вот некыз он вермы думыштны, мый сэсся водзөсө лоис.

Муртса удиті медбөрья петуксө вөтлыны, кызди миян керка весьтті быттьө төвныр муніс. А сэсся, видзөда да, миян керка өшинь увті шавксьөдөны-мунөны... дзодзёг гоз!..



ЎТЧЫД ВУГРАСИГЌН

Быдсяма дивёйд жё вермас овлыны челядь дырйиыд! Торья нин гожеся гажа кадё! Прёстё од верстьё йёзыд долыдпырысь оз казътывны ассыныс челядь олёмсё! Од мыйсё он эштыв вёчлыны гожём чёжнад, кор школаыс лэдзаласны, а нёшта нин долыд сьёлём вылад, тэнад дневникын кё сулалёны сёмын «четвёркаяс» да «пятёркаяс»!

Гожёмнад и видз вылад ветлан, и вуграсян, и купайтчан да и пыжён на пётгёдзыд шедлас гуляйтыштны!

Ме зэв радейта лэччывлыны Эжва берег вылё вуграсьны. Да и кызди нё он радейт! Мукёд дырйиыс, лёнь асылын, кор шондыс муртса на петыштё, лэччан ва дорад, да чериясыс сідзи и чеччёны, мукёдыс юрсё чургёдлас ва веркёсас, а мукёдыс весиг тушанас звиркнитлас чеччыштлас: со пё ме кёні, кужан кё пё, кый!

Но вуграсьём — вуграсьём и эм. Овлё, и зэр улё веськавлан, быд сунис пом кётасяс, сайёдчынытё он удит.

Менам вёлі зэв радейтана места, кытчё вёлі котравывла зэригъясад. Эжва джуджыд берег нёрыс йылын сулаліс бакенциклён керка. Но керкаён дзик шуны оз

позь, мыйкө сэтшөм, пывсян кодь. Сэни оліс да дөзвөри-тіс вешкаяс да бакенъяс Осип дед. Төвнас сійө гортас оло, а гожөм кежлас овмөдчылас тайө будкаас. Сійө жө вөлі и вуджөдчө тшөтш — ветлысь-мунысьөс мездывлө. Оні од бакенъястө оз ков, небось, өзтавны карасинөн, автоматъяс лөсьөдалөмны, а найө, морт отсөгөн жө, дерт, любөй поводдяө өзтасны и кусөдасны ас кадө.

Гожөмнад мыйыс сөмын дедлөн эз вөв! Быдсяма шылльө-мылльө ловъяястө будкаас вөлі чукөртас. Осип дед найөс кызкө зэв ёна радейтө. Сылөн вөлі и лявк-сысь понйыс, и кык-куим каньпи да весиг чипанпиянөс на вөлі видзө. Қызкө, мися, зэв нин ёна радейтіс ичө-тикъястө! Пон көть кань сэсса, медтыкө ичөт вөлі-а!

Гожөм кежлад босьтас гортсыс өти курөгөс да пөжө-дас и быдтас сылысь пиянсө гырысьөдз. А вердөм кузяыд уна-ө налы и колө? Чериөн вердыштін дай ставыс! Сөмын сьөлаяс моз чипсалөны да дзирнясьөны-ветлөдлөны.

Чипанпиян пытшкын медся збойыс вөлі өти петушок, коді зэв нин сьөлөмсяныс велөдчис сывны-чуксасыны. А аслас нинөм на ещө оз и артмы. Сьылө, быттьө кодкө тыртөм консерв банкаө кучкалө пу паньөн.

Тайө петушокыс эз өтдорт некодөс, быдөн дорө локтө, а ме дорө сэтшөма велаवलіс, мый понпи моз вөтлысис ме бөрся. Ме сійөс нидзулөн вердывлі. Төдө тай бур вө-чөмтө, көть и ичөт!

Но өтчыд лои сэтшөмтор, мый нидзулөн чөсмасьөмысь сылы ковмис дзыкөдз өвсьыны...

Өти асылө, кор муртса удиті самавны ассьым вугы-рөс да чөвтыштны ваө, воис сьөд кымөр да дугөдіс мен-сьым вуграсьөмтө,— зэрмис, быттьө ушат дорысь кутіс кисьтны. Қватиті вугыр шатинөс да өдйөджык котөрти нөрыс йылө, дед дорө.

Вугыр шатинөс сувтөді будка пельөсас... Ачым пыри дед ордө да зэригкөстіс кыкнаннымлөн и вугыртсьөма-унмовссьөма... Зэригад кызкө зэв нин чөскыда узьсьө.

Дыр-ө узьсьөма, ог төд, а садьми пон увтөм вылө. Кепкаөс юрө суйышти да өдйөджык петі ывлаө. Дедөс эг и чуксав, зэв нин чөскыда жө узьө да.

Шондыс дзирдалө вылын нин. Вөлі гөгөр чөв-лөнь. Қватитчи, а вугыр шатинлөн сөмын местаыс. Дукуыс абу. Котөрти өтилаө, котөртлі мөдлаө — некөн абу... Мый нө тайө, думайта да. Челядь кө нин пышйөдөмаөсь-а? Қөсья нин вөлі бөр бергөдчыны да дедөс чуксавны, сійө код-

лыкӧ эз-ӧ сет вуграсьыштны. Но друг бужӧд боксянь кылі понлысь зэв яра лявксӧмсӧ. Воськӧдчи сэтчань да мый жӧ аддзи!

Менам шатинӧй ӧтнас мунӧ, быттьӧ визувтӧ турун пӧвстӧдыс... Мый нӧ, мися, тайӧ? Қаститчӧ кӧ нин лун шӧр лунӧ-а? Сэсся, видзӧда да, менам шатин бӧрся вӧтчӧны дедлӧн став чипанпияныс... Чипанпиян бӧрся увтӧм-сорӧн вӧтчӧ и ичӧтик понйыс, а медбӧрын ӧдва удитӧ вӧтчынысӧ котсьысь курӧг-мам...

Сьӧкыд гӧгӧрвоны, мый вӧчсьӧ тайӧ кывтӧм пемӧс араваыскӧд! Гашкӧ, мися, век на узя да?

Сэсся видзӧдлі водзӧджык, «колонна» юрас, да аддзи: медводзын чеччалігтырйи патурликасьӧ-мунӧ менам тӧд-са да радейтана петушокӧй... да кыскӧ менсьым вугыр шатинӧс.

Ме, дерт нин, дзыкӧдз чуйми, ӧдйӧджык вӧтӧді да гӧгӧрвои ассьым ӧшыбкаӧс!..

Коньӧрӧй да петушокӧй! Вӧлӧмкӧ, менам тӧрмасьӧм-сорнад вугыр шатинтӧ сувтӧдсьӧма самнас, со петушокыд и кватитӧма вугыр си йылад мӧвкъялысь нидзувтӧ...

Мый вӧчны? Қолӧ спаситны и петушокӧс, и вугырыс жаль... Ӑд вугырыс вӧлі кутшӧм бур! Ӑти классын велӧдчысьлы ассьым складникӧс на сетлі сы вылӧ. Быд волӧмын вӧлі вуграла пӧрт чериӧн... тожӧ абу шутка!

Қор ме куті вӧтчыны вугыр шатин бӧрся, став свитаыс ещӧ на содтісны мунан ӧдсӧ... Быть ковмис тальчыны шатин вылӧ да сувтӧдны ӧдва ловъя петушокӧс... Босьті мездорӧ да ӧдйӧджык мезді сійӧс. А кор киясь лэдзи сійӧс, ӧдйӧ жӧ нин, коньӧр, визувтіс ме дінысь, быттьӧ лӧчкысь мыні!..

Со ӧд кутшӧм неминуча вермас лоны вуграсьысьыдлӧн! А дедлы сідзи эг и висьтавлы та йылысь, мися, вермас на ещӧ и петшӧравны кытсюрӧ...

Вуграсьӧм вылас макниті киӧн да тӧрмасьӧмӧн усйыси гортӧ... Мый вермис лоны менам вугыркӧд, ӧнӧдз ог тӧд. Сӧмын сійӧ тӧда, мый менам радейтана петушокӧй кольӧма ловйӧн, но, дерт, эз нин сэсся некор матыстчывлы вугыр шатин дорӧ, да и ачым сюсьджык лои.

Быть лоис ӧвсьыны кос нӧрыс йылын «вуграсьӧмысь». Қоді тӧдас, мый ещӧ вермас кӧласьны самалӧм вугырад.

ЮРИНДАЛЫСЬ

Ветлысь-муньсь Тузик	3
Витька петалис туйö	7
Мирон дедлön висьт	15
Абу вунöдöмаöсь...	25
Öтчыд вуграсигön	29

Иван Иванович Тарабукин

ВИТЬКА ОТПРАВИЛСЯ В ПУТЬ

Рассказы

На коми языке

Редактор *В. А. Попов*

Художник *П. И. Семячков*

Худож. редактор *А. В. Мошев*

Техн. редактор *А. Н. Вишнева*

Корректор *М. М. Дейнега*

Сдано в набор 15.VI.1971 г. Подписано к печати 23.II.1972 г. Формат 84x108¹/₃₂. Бум. л. 0,5; печ. л. 1,64; уч.-изд. л. 1,53. Заказ № 6361. Ц00140. Тираж 4000. Цена 5 коп. Бумага № 1.

Коми книжное издательство, Сыктывкар. Дом печати.

г. Сыктывкар, Республиканская типография Управления по печати при Совете Министров Коми АССР.

15 КОР.

